

АКАФИСТ ПРЕПОДОБНОМУ ДИМИТРИЮ, ИГУМЕНУ ВОЛОГОДСКОЙ ПРИЛУЦКОЙ ОБИТЕЛИ, ЧУДОТВОРЦУ

Кондак 1

Избранный чудотворче и изрядный угодниче Христов, преподобне отче наш Димитрие, друже и собеседниче друга Божия преподобнаго Сергия и отечества твоего присный заступниче, прими от нас с любовью приносимое тебе хвалебное пение и, яко имеяй дерзновение ко Господу, молитвами твоими от всяких нас бед свободи, да зовем ти: Радуйся, Димитрие, великий чудотворче.

Икос 1

Ангел образом, аще и человек по естеству, был еси преподобне отче Димитрие: ангельскую бо чистоту стяжал еси на земли, и ангельскою красотою лице твое цветяше, яко всем видевшим тя чудитися благолепию твоему. Тем же, яко избранника Божия благолепнаго душею и телом, ублажаем тя песньми сими: Радуйся, благочестивых родителей пречестное порождение. Радуйся, града Переяславля святое прозябение. Радуйся, Российския страны духовное украшение. Радуйся, евангельскаго по Бозе жития ревнителю. Радуйся, от юных лет жизни твоя единаго Христа вседушно возлюбивый. Радуйся, богатство тленное и куплю временную презревый. Радуйся, серафимскою любовью ко Господу сердце твое воспламенивый. Радуйся, дары Святаго Духа в душу твою достойно восприявый. Радуйся, Димитрие, великий чудотворче.

Кондак 2

Видевше родителие твоя, преподобне отче, яко не прилежало сердце твое к богатству земному, но яко от младых ногтей ты предпочел еси искати единаго на потребу, еже служити и благоугождати Христу чистым и непорочным житием, премного удивляхуся таковому твоему благонравию и радостно воспеваху Богу, в юности сице ты укрепивше-му, благодарственную песнь: Аллилуиа.

Икос 2

Разум богопросвещенный стяжав, уразумел еси добре, отче Димитрие, указуемый Спасителем мира путь к высшее совершенству духовному. Тем же по смерти родителей твоих, абие куплю временную оставил еси и все богатство твое нищим расточил еси, себе облегчая к неприкосновенному течению во след Христа. Сего ради ублажаем тя таковыми богохвальными словесы: Радуйся, подвижниче Божий, мира красотою не прельстивыйся. Радуйся, нищету вольную Христа ради возлюбивый. Радуйся, богатство многое меньшим братьям Христовым раздававый. Радуйся, нищия и убогия от имени твоего удовливый. Радуйся, нагия одевый и гладныя питаваый. Радуйся, вдовицам и сиротам отец

и благодетель бывый. Радуйся, крест Христов носи́ти усердно возжелавый. Радуйся, смирение Христово в душу твою насадивый. Радуйся, Димитрие, великий чудотворче.

Кондак 3

Сила духовная свыше от Господа тебе даровася преподобне отче, егда в пострижении иночестем ангельский образ восприял еси и всякое плотское мудрование совершенно отложил еси, яко быти тебе воистину последователем Христовым, на Христа бо единого присно взирал еси умными очима души твоя и Его заповеди святые выну имел еси пред собою, яко светильник путеводящий, зовы Ему от любви теплыя: Аллилуиа.

Икос 3

Имея попечение о спасении души твоя, безмолвия возжелал еси, преподобне отче, и на месте блатнем и пустынем близ града Переяславля поселился еси, един единому Христу работая в посте и молитвах: обаче не утаися житие твое преподобное от сограждан твоих, иже прихождаху к тебе, овии молитв и благословения от тебе прося, овии наставитися во спасение от тебя желая, инии же жительствовати с тобою хотяху под твоим духовным руководительством: ты же грядущих к тебе не отгонял еси, но спасению душ человеческих служил еси, еже воспоминаая, хвалебно вопием ти: Радуйся, учителю благочестия, примером жития твоего всех поучавый. Радуйся, наставниче богомудрия, словесы твоими богодухновенными ученики твоя во спасение назидавый. Радуйся, иночества богоугоднаго правило известное. Радуйся, пути теснаго, во Царствие Небесное ведущаго, указателю нелестный. Радуйся, евангельских заповедей верный исполнитель. Радуйся, непоколебимый столпе Православия. Радуйся, сотворивый и научивый и великий нареченный во Царствии Небесном. Радуйся, со усердием послуживый ко спасению многих душ человеческих. Радуйся, Димитрие, великий чудотворче.

Кондак 4

Бурное треволение житейского моря безбедно преплыл еси, всеблаженне отче, и в тихое пристанище пустыни достигл еси. В ней же обитель иноком возградил еси во имя святителя и чудотворца Николая и сам освящения иерейского сподобился еси, игумен богомудрый обители твоя быв, кротко пасый Богом врученныя тебе словесныя овцы и немолчно воспевая купно с ними хвалебную песнь Пресвятей Троице: Аллилуиа.

Икос 4

Слышав о дивней красоте лица твоего, отче Димитрие, едина от именитых боярынь града Переяславля возжелала насладитися лицезрения твоего и сего ради прииде к келии твоей, в ню же оконцем приикнув, узре тя на молитве стояща и светом небесным облиставаема, сама же абие всем телом разслабе и

падши яко мертва, на земли лежаше. Ты же, послушествуя прошению братии твоей, молитвою твоею исцелил еси ю и поучил, да прочее уцеломудрится и не назирает чуждыя красоты, тем же и мы, чтуще такую чистоту души твоея, вопием ти сице: Радуйся, светильниче Божия благодати, дарами Духа Святаго светло блистающий. Радуйся, еще на земли светом небесным озаренный. Радуйся, светом лица твоего велию светлость души твоея проявивый. Радуйся, оным светом жену нескромную уцеломудривый. Радуйся, словеса твоими духовными добре ю поучивый. Радуйся, крине девства и чистоты, на земли процветший. Радуйся, красоту лица твоего завесою иноческаго куколя сокрывавый от нечистых воззрений очес человеческих. Радуйся, опасно себе хранивый от искушения. Радуйся, Димитрие, великий чудотворче.

Кондак 5

Богосветлое светило быв, отче Димитрие великаго светильника пустыни Радонежския, богоноснаго Сергия, подвига еси посетити тя в безвестней и бластней пустыни живущаго: его же с любовию о Христе приял еси и духовным собеседованием с ним утешился еси, и от того времени друг присный и сотаинник ему соделался еси, ныне же вкупе с ним предстоиши небесному престолу Троицаго Бога и сладце поеши Ему: Аллилуиа.

Икос 5

Видевше тя, преподобне отче Димитрие к богоносному отцу Сергию любовь велию о Христе стяжавшаго, на собеседование к нему духовное от пустыни твоея пешеходившаго и с ним вкупе бдения всенощныя совершавшаго, при них же лучина свечи вам заменяше, молитва же ваша, яко пламень огненный, до небес досязаше, дивимся такому содружеству твоему с великим угодником Божиим и сице тебе зовем: Радуйся, друже святых, присный Богу. Радуйся, спостниче и собеседниче преподобнаго Сергия. Радуйся, всероссийскаго заступника и молитвенника любимый сомолитвенниче. Радуйся, от уст Сергиевых глубину премудрости духовной почерпнувый. Радуйся, велию любовь о Христе к нему стяжавый. Радуйся, возшедый на высоту совершенства духовнаго. Радуйся, проникый во глубину смирения святаго. Радуйся, небесный человеке, во плоти бесплотным поревновавый. Радуйся, Димитрие, великий чудотворче.

Кондак 6

Проповедника тя благоумилennaго познав отче Димитрие, благо-верный великий князь Димитрий зело тя возлюби и отца духовнаго себе сотвори, восприемником же от святаго крещения единого от сыновеи своих тя избра да будеши присный наставник и молитвенник ему со чады: ты же, преподобне, не возгордился еси толикою любовию к тебе великаго князя Российскаго, но паче преуспевал еси во святем смиреннии, зовый прославльшему тя Владыце Богу: Аллилуиа.

Икос 6

Возсия добродетелей твоих свет велий во всю страну Российскую, преподобне отче наш Димитрие, и мнози прихождаху к тебе издалеча насладитися бо-годухновенных твоих учений: быша бо уста твоя полна сладкаго учения духовнаго, язык же твой, яко трость книжника скорописца, написавшаго на сердцах человеческих словеса жизни вечныя. Тем же, яко благоумиленнаго учителя и к покаянию действеннаго возбудителя, восхваляем тя по достоянию сице: Радуйся, врачу благоискусный недугов душевных. Радуйся, возбудивый к покаянию спящия совести. Радуйся, умягчивый ко исправлению окамененныя сердца. Радуйся, иноков и мирян ко спасению верный руководителю. Радуйся, образ кротости духовный. Радуйся, правды Божией нелице-приятный провозвестниче. Радуйся, сильных мира, о правде нерадивших, небоязненный обличителю. Радуйся, обидимых и гонимых много-мощный заступниче. Радуйся, Димитрие, великий чудотворче.

Кондак 7

Хотение усердное имел еси, преподобне отче, да в безмолвии невозбранно поработаеши Богу, и сего ради убегая молвы приходивших к тебе людей, оставил еси тайно обитель твою и град отечества твоего и со учеником твоим Пахомием удалился еси в пределы Вологодския, в пустыню безлюдную, в ней же келию себе малу соорудив, и тамо пребывал еси в подвизах пустынных, немолчно воспевая Христу Богу ангельскую песнь: Аллилуиа.

Икос 7

Новую обитель иноческую, зачинаемую в пустыни, видевше окрестнии жителие грубостию нрава содержимы, гневахуся на тя, преподобне отче, и поношаху тя, яко поселился еси на земли их. Ты же по евангельскому Христову глаголу места гневу не уступая, отшел еси от тоя пустыни и ко граду Вологде приблизился еси, в предградии его на Прилуцех поселитися возжелав, да чувствуем тя, яко отца и первоначальника иноков вологодских, и песенно тебе вопием: Радуйся, пустыннолюбивая горлице, от шума мирскаго в благоотишие пустыни отлетевшая. Радуйся, незлобивая голубице, гневом неразумных человек не уязвленная. Радуйся, мудрый странниче, иский отечества горняго. Радуйся, худые и многошвенныя ризы носивый. Радуйся, веригами железными тело твое обложивый. Радуйся, крест Христов, яко оружие непобедимое, спутника себе стяжавый. Радуйся, икону Пресвятыя Богородицы, яко стену ограждения, всегда с собой имевый. Радуйся, пустыню бесплодную благодатно у плодоносивый. Радуйся, Димитрие, великий чудотворче.

Кондак 8

Странник и пришлец был еси во граде Вологде, преподобне отче наш Димитрие, ныне же присный предстатель и заступник его, видев бо сей град, церквами святыми благоукрашенный, возлюбил еси его, и по умолению жителей его

на Прилуцех в предградии место уединенное обрет, на нем вселился еси, и честный крест руками своима соделав, водрузил еси, начало обители Спасовой полагая и присно воспевая распеншемуся на кресте Царю славы Христу: Аллилуиа.

Икос 8

Весь в Бозе быв, преблаженне отче, о временных вещех не заботился еси, и обитель твою на Прилуцех не толико богатством, колико слезами и подвигами твоими молитвенными созидал еси, всецело уповая на Спаса Христа, яко Сам препитает тя с братиею своею: и тако бысть по вере и молитве твоей: ни в чесом бо лишен был еси, но во всех потребных к ясению изобилував еси Промыслом Божиим дивным. О сем тя хвалим и взываем сице: Радуйся, с посохом странническим во град Вологду пришедый. Радуйся, в нем второе отечество себе обретый. Радуйся, любовью о Христе крепче его возлюбивый. Радуйся, обитель Спасову в предградии его соорудивый. Радуйся, подвиги твоими сию прославивый. Радуйся, яко отец чадолюбивый, молитвенно назидая чада твоя духовныя. Радуйся, пророче дивный, будущая, яко настоящая, провидевый. Радуйся, целителю безмездный, болящих молитвою своею исцеливый. Радуйся, Димитрие, великий чудотворче.

Кондак 9

Все ангели небеснии и святыя лица сретоша тя радостно, преподобне отче Димитрие, егда святая твоя душа, кончиною преподобною разрешившаяся от соуза плотскаго, восхождаше во обители горния: и Сам Творец ангелов и Святый святых, Христос Господь, тобою от юности возлюбленный, увенча тя венцем нетленныя славы и сопричте лику святых, выну воспевающих Ему песнь хвалы и славословия: Аллилуиа.

Икос 9

Витий человеческих благословесие не довлеет к достойное прославлению многих подвигов твоих, преподобне отче наш Димитрие, ими же житие твое святое, яко цветами, благоуукрашается и духовно благоухает, от ранния бо юности твоя и до старости маститыя неослабно Богу благоугождал еси и волю Его святую присно творил еси, чесо ради кончину праведную, яко венец подвигом твоим, от Господа получил еси, и благоухание сладостное от мощей твоих абие по кончине твоей истече, всю обитель твою облагоухав: тем же и мы, таковое преставление твое прославляюще, зовем ти сице: Радуйся, великий угодниче Божий, от земли прешедый к обителем небесным. Радуйся, воздух облагоухавый восхождением души твоя святыя в селения горняя. Радуйся, обитель твою освятивый многоцелебными твоими мощами. Радуйся, яко душа твоя в руке Божией хранима есть на веки. Радуйся, яко прочее не прикоснется тебе ни скорбь, ни болезнь. Радуйся, яко мощи твоя святыя исцеление благодатныя верным источают. Радуйся, яко испросил еси от Господа власть над духи нечистыя. Радуйся, яко предстательством твоим свобождаеши человеки от злаго их насилия. Радуйся, Димитрие, великий чудотворче.

Кондак 10

Спаса Христа умоляеши за град твой и люди твоя, преподобне чудотворче Димитрие, сие бо показал еси яве во дни обложения ратного Вологды, явлься единой благочестивей инокине, с двумя светлыми белоризцами обходя стены града и утверждая их, да непоколебимы пребудут от нападения враждебныя рати, яже вскоре со студом отступи от града, не возможе его победити, люди же вологостии прославляху и воспияху Богу: Аллилуиа.

Икос 10

Царя Небеснаго Господа Иисуса верный раб и угодник был еси, преподобне отче Димитрие, и от Него получив велию благодать, царю земному, благоверному великому князю Иоанну, победити царство Казанское помогл еси, явлься среди полков российских и побораая им агаряны нечестивыя помощью небесною вскоре взяти стольный град их Казань. Сие явление твое мы вспоминая, благодарственно зовем ти: Радуйся, святче Божий, со святым обитай, и за грешныя Бога умоляяй. Радуйся, угодниче Христов, от горних высот к земнородным милостиво приникаяй. Радуйся, любовь твою к отечеству земному и по смерти сохранивый. Радуйся, помощь твою святую стране Российстей чудесно явивый. Радуйся, яко архистратиг воим Российским на агаряны побораый. Радуйся, град Казань взяти им дивно помогавый. Радуйся, град твой Вологду от нападений ратных множицею избавивый. Радуйся, сострадания преисполненный и в милости богатый. Радуйся, Димитрие, великий чудотворче.

Кондак 11

Пение наше молебное милостиво прими угодниче Божий, преподобне отче Димитрие, и щедроты твоя целебныя даруй нам в недужех наших: тебе бо стяжахом врача изряднаго и немздоприимнаго, присно готоваго помогати нам и исцеляти недуги наша данною ти от Господа благодатию. Юже прославляя от благодарныя души, вопием тобою благодееющему нам Богу: Аллилуиа.

Икос 11

Светлыми лучами чудес твоих благодатно просвещаеши, святче чудотворче Димитрие, не токмо град твой и обитель твою, но и всю страну Российскую. В ней же, яко великий угодник Божий, усердно прославляеши он верных, ближним и дальним щедроты твоя целебныя милостиво даруяй, да вси радостно зываем сице: Радуйся, великоименитый всероссийский наш заступниче. Радуйся, ангело-равный человеце. Радуйся, звездо утренняя, мрак нечестия прогоняющая. Радуйся, забрало неоторимое от враг видимых и невидимых. Радуйся, молящимся тебе на помощь ускоряяй. Радуйся, огненное запаление призыванием имене твоего угашаяй. Радуйся, беспомощных скорый помощниче. Радуйся, благодати Божией многоцелебный источниче. Радуйся, Димитрие, великий чудотворце.

Кондак 12

Благодати причастное изображение лица твоего даровал еси людем твоим в благословение и утешение, преподобне отче Димитрие, и от Него чудеса многая совершил еси, яко чудотворец преславный. Тем же с верою и любовью поклоняемся иконе твоей, святыи наш предстателю, и, величая возвеличившаго тя Христа Господа, хвалебно зовем ему: Аллилуиа.

Икос 12

Поюще многая твоя чудеса и велие сострадание твое к людем, ти сродным, Димитрие богоблаженне, благоумиленно просим тя, небеснаго заступника нашего: принеси за ны сердныя молитвы твоя ко Господу и испроси нам кончину жития благую и непостыдную, да помощию твоею святою спасение вечное унаследуем и вкупе с тобою водворимся тамо, идеже присещает свет лица Божия и веселит вся от века праведники. О сем тя молим и зовем: Радуйся, благоволением Пресвятая Троицы осененный. Радуйся, лицезрения Пресвятыя Богородицы удостоенный. Радуйся, Агнцу Божию последовавый на земли. Радуйся, с девственными лики предстояй Ему на небеси. Радуйся, со избранники Божиими поклоняйся Творцу. Радуйся, дерзновение молитвенное стяжавый к Небесному Отцу. Радуйся, о нем же радуются и Бога славят человецы. Радуйся, душ и телес наших благодатное врачевание. Радуйся, Димитрие, великий чудотворце.

Кондак 13

О великий чудотворче и скорый в бедах помощниче, преподобне отче наш Димитрие! Тебе молимся и тебе просим с верою к любвию: приими милостивно сие малое хвалебное пение, от усердия нашего тебе приносимое, и умоли Господа Бога в день страшнаго суда Его помиловати нас и избавити осуждения вечнаго, да сподобимся блаженныя части одесную Его стоящих и радостно Ему воспоем: Аллилуиа.

(Этот кондак читается трижды, затем икос 1 и кондак 1)